

交城縣志 卷之八上



錢塘 趙吉士編次



藝文攷目錄 計三條



誥勅

序

記

交城縣志

卷之八

藝文攷

上

昔人有言詞者心之聲也文者詞之華也是故實根於心華發於外不得不然譬之日月星辰發乎天山川草木發乎地羽毛鱗介發乎物而神理寓焉故曰文以載道道顯於文若是乎文之不可已也交有藝文卽不可謂之道然而宸翰煥綸縉之章文人繪琬琰之句一詞一咏咸出乎聲而根於心者也猶之天地萬物無所爲



文而文自顯其神理之寓蓋有不期然而然者亦足以彰往察來維風振教匪徒馳騁筆舌爲月露之形雕蟲之伎已矣然則後之君子或亦因而有可見哉誌藝文

趙吉士曰盛世之言厚以朴衰世之言浮以華樂土之言淡泊而舒徐貧土之言悽愴而迫促出於心而發於口不知其所以然而無不然也故虞舜在治忽以出納五言成周太史採風輶軒遍於列國聖人之視言深矣吾誌交藝文凡詔誥碑記詩賦總得若干篇損舊者十之二益舊者十之六覽其言可以觀代焉可以觀俗焉可以觀政焉故以藝文終之

誥勅

明

陝西道監察御史李天賦勅

朝廷設監察御史欲其振紀綱辨邪正以鼎成國家之治非得直方清慎之士曷克以稱爾陝西道監察御史李天賦發身科甲典司憲紀歷



年旣久式克勤慎是用錫之勅以示褒嘉夫官以監察爲名以言爲職在明大體而畧細故在愛君子而戒小人其益端爾志堅爾守毋私於法毋撓於勢毋訐以爲直毋苛以爲能明以燭之公以行之懋修而不懈尙有顯爵以待爾成欽哉

吏科都給事中解一貫勅

朕惟六科建置七品分官各應部曹實預盈庭之議職司獻納亦均治事之勞國體是關公論攸托茲惟清要之地宜居俊乂之才爾吏科都給事中解一貫登名甲第列職諫垣闕廷輪執奏之忱部置嚴參駁之體才旣優於閱歷志益慎於操修宜錫寵名以示褒勸茲特進爾階文林卽錫之勅命嗚呼論事者必先其大尙存爲國之心持身者必保其終勿替官守之節益臻後效以俟登庸欽哉

贈孀人闔氏勅

臣有事君之功家隨以顯妻有從夫之義身與



其榮國典具存彝倫攸繫吏科給事中解一貫  
妻閻氏揚芬令族儷美儒門夙稱內助之賢中  
撥宜家之美念惟往懿特昇殊恩茲特贈爲孺  
人未泯之靈尙其歆服

封孺人鄭氏勅

妻必有繼式隆饋祀之儀恩貴乎均爰及褒封  
之典茲雖著令實體恒情吏科給事中解一貫  
繼室鄭氏早嫻內則繼配儒門雖未躬荆布之  
勞亦克效蘋蘩之職乃因夫貴用是褒恩茲特

封爲孺人服此嘉名益勤內助

贈文林郎貴州道監察御史胡方獻勅

朕孝奉兩宮載舉尊親之典恩均四海肆推錫  
類之仁顧遺澤之有聞豈追封之可愆存亡弗  
異今古攸同爾胡方獻乃貴州道監察御史體  
乾之父科第遺才鄉邦名士事親能孝全至行  
之無虧濟物以仁播高風而未泯篤生賢嗣榮  
列內臺扶正抑邪言每關乎國體奉公守己名  
克重於時評揆廷訓爲可徵眷國恩之肇賁克



文城縣志 卷之八上 告力五  
成先志永闡幽光茲特贈爲文林郎貴州道監察御史庶幽靈之允慰尙歆享於無窮

封太孺人李氏勅

母道不專於鞠育有教斯成子職不限於旨其惟名是顯顧乃西臺之彥足占內範之良令式具存寵光宜賁爾貴州道監察御史胡體乾之母儉勤胥至孝敬並全體乾道以相夫化行中闡佐義方而訓子名顯甲科享祿養以方隆引慈齡而未艾爰頒渥典用耀賢名茲特封爲太

孺人茂膺冠帔之華益衍庭闈之慶

貴州道監察御史胡體乾勅

朝廷寄耳目於臺憲俾宣德達聰以決壅蔽厥責攸重朕恒以得人爲難爾貴州道監察御史胡體乾蔚以甲科之彥簡居內臺乃能懋服官箴忠藎自勵激揚有體建白殊多爾其無忝厥職者與茲特進爾階文林郎錫之勅命嗚呼朕方渴於求治思直言敢諫之臣爾其奮猷體國開誠布悃以副朕意其懋敬之哉



封孺人楊氏勅

朝廷敷錫群臣爰及厥配實惟內助之賢有相成之道焉爾貴州道監察御史胡體乾妻楊氏育秀儒家德配名士賢而克相宜錫褒恩茲特封爲孺人益懋欽承用光閨闈

贈奉直大夫戶部員外郎解康誥

國家推恩臣下必追責其所生蓋敦本而勸孝存沒一也爾贈徵仕郎工科給事中解康乃南京戶部廣西清吏司員外郎一經之父夙有義

方訓成二子並以才識效用於時載錫寵章用增耀於不朽茲特贈爾奉直大夫南京戶部廣西清吏司員外郎尙克歆承益昌厥後

贈宜人孫氏誥

賢才之興雖由父訓而母德鞠育恩與父偕故褒典均焉爾贈孺人孫氏乃南京戶部廣西清吏司員外郎解一經之母訓子居官而養弗逮可無卹命用慰孝思茲特贈宜人懿靈不昧享此茂恩



戶部廣西司員外郎解一經誥

戶部古地官之職國儲攸賴故設屬視諸曹爲  
詳必得其人乃克稱焉爾南京戶部廣西清吏  
司員外郎解一經蔚以賢科之彥簡自外僚進  
遷今職乃能勤慎金懋邦計是禪朕甚嘉之茲  
以大慶霑恩特進爾階奉直大夫錫之誥命爾  
其益勵乃心修乃業嗣膺明陟副茲訓詞欽哉  
封宜人路氏誥

朝廷敷錫群臣爰及厥配實惟內助之賢有相

成之道焉爾南京戶部廣西清吏司員外郎解  
一經妻路氏恪修婦道順以相夫夫旣顯榮爾  
宜益貴茲特封爲宜人祇承休命益慎壺儀  
浙江按察司副使胡體乾誥

朕分部置使俾按邦刑雖以糾察典獄爲職而  
吏治之能否民生之利病悉以屬之厥選顧不  
重哉爾浙江按察司副使胡體乾性行醇謹操  
履端潔昔朕踐祚之始適爾階計來上時慎簡  
臺諫疇咨選衆擢置中臺論建弘明務存大體



往歲出按方岳益振風猷貞肅之聲被於秦越  
既以邦畿近地屢報瘡痍執政者言爾按歷南  
北克稔民暑掇自臺端俾以出守孤竹瀛海茂  
著循良頃念爾勞望滋深陟副浙臬吳越之會  
俗尙侈靡聞爾下車以來敦本黜浮風清弊絕  
斯非予康濟經綸之臣哉茲以大享覃恩特進  
爾階中憲大夫錫之誥命其尙少安以俟殊擢  
封恭人楊氏誥

凡有臣工宣力以事其上是有中饋相之寵綏  
之典不加何以爲勸爾浙江按察司副使胡體  
乾妻封孺人楊氏生有淑質丕勤姆訓擇配良  
人克諧厥美孝勤恭儉雖貴不渝觀爾夫子矢  
力公家揚休臺轄爾之相助可徵也茲特加封  
爲恭人服此嘉名益敦壺教

戶部主事徐肅勅

戶部司養民之政其任匪輕故置屬詳於諸部  
苟非其人曷稱任使爾行在戶部山東清吏司  
主事徐肅列身胄監擢屬秋官轉職於茲克效



勞勩既歷歲年考績惟稱是用錫之勅命授承  
直卽以示褒嘉朕方董正治官以責庶務之實  
爾宜益懋廉慎以俟顯陟毋怠毋縱爾惟欽哉  
都督府都事韓宗孔勅

國家分督府以領五軍雖專武職置幕官以理  
庶務則用文資寓意實深用人宜慎爾后軍都  
督府都事韓宗孔胄出宦門名登鄉榜官居府  
幕職領文移在公稱綜理之能處已勵操持之  
志屬當大慶宜示渥恩茲特進爾階文林郎錫  
之勅命嗚呼居官以盡職爲良已徵往勩保譽  
以永終爲善勿替初心尙有崇階以需來效欽  
哉

潘府長史韓宗孔勅

朕稽典循訓以惇親睦之道肆於宗藩必重厥  
官屬顧惟輔導必簡端人爾潘府左長史韓宗  
孔夙以明經發身科目試叅督事已著才名晉  
擢宗經益隆時譽爰咨輿論俾相藩封乃能懋  
著匡扶導以德義而君臣胥悅寮屬允孚朕甚



嘉之茲以元嗣之祥特進爾階奉政大夫錫之  
誥命嗚呼茂衍姬宗滕畢稱善光昭漢業董賈  
惟賢仰企前休以副朕意欽哉

河南新安縣知縣魏恭勅

民牧之責莫切於縣令匪得公廉愷悌之士曷  
克稱焉爾河南新安縣知縣魏恭發身胄監擢  
任斯職歷年茲久政績有聞宜錫寵章用旌勞  
勩茲特授爾階文林郎錫之勅命以爲爾榮其  
益盡心毋怠厥職稱朕養民之意欽哉

兵馬副指揮孫繩武韓鉞勅

京師天下之都會故置官察視巡邏所以摧奸  
宄而佑良善也爾兵馬副指揮孫繩武韓鉞發  
身胄監授任今官勤慎著聞宜膺褒典茲特進  
爾階文林郎錫之勅命爾其益盡乃心修乃職  
嗣膺顯陟副我命詞欽哉

錦衣虎賁衛經歷孫凱韓遇臣勅

國家設兵衛以理軍政旣以武臣爲之長貳至  
其幕職亦必得人乃克有濟爾錦衣衛虎賁經



歷孫凱韓遇旺任職於斯式克勤慎是用授爾  
階徵仕即錫之勅命以爲爾榮其益盡心毋怠  
厥事欽哉

義民陳立閻表王文勅

國家施仁養民爲首爾能出米一千二百石用  
助賑濟有司以聞朕甚嘉之今特賜勅獎諭勞  
以羊酒旌爲義民仍免本戶雜泛差役五年尙  
允蹈忠厚表勵鄉俗用副朝廷褒嘉之意欽哉  
故勅

贈徵仕即行人司行人李執中勅

虎生而炳蘭植而馨誕茲嘉種國恩首賁若考  
爾李執中乃行人司行人之奇之父道腴安貧  
義方訓子設教無類敦倫有方德器素重於儒  
林謙光雅慕乎鄉曲是用贈爾爲徵仕即行人  
司行人噓杞梓以初華光櫬材而永耀  
封太孺人岳氏勅

王事鞅掌不遑將母詩人歌之以恤勞子爾岳  
氏乃行人司行人李之奇之母柔順有淑悃悞



無華養尊而二簋可怡教子而六翮斯具是用  
封爾爲太孺人純嘏有當慈徽克衍

行人司行人李之奇勅

昔臣讀皇華之章懼無古人延美之譽磨勵靡  
盥思不辱命可以觀志爾行人司行人李之奇  
風規高潔氣節堅凝升秀彤庭試猷英練每懷  
得諏謀之意所至多冰蘖之聲不第嫺辭式克  
宣德茲以覃恩授爾階徵仕郎錫之以勅命馳  
驅雖勞臣小節毋曰易仔抑有戢暴賑荒如古

王賀汲黯其人者乎底爾遠績

封孺人白氏勅

人臣釋褐而仕雖原隰委遲無庸挽鹿而勞則  
攸同爾行人司行人李之奇妻白氏荼苦能甘  
機絲克警烹葵而饒慈旨酌水以佐官廉是用  
封爾爲孺人分綵鸞泥永襄羔素



誥勅

國朝

勅贈文林郎河南河南府洛陽縣知縣武篆

制曰資父事君臣子薦匪躬之誼作忠以孝國家弘

錫顛之恩爾武篆乃河南河南府洛陽縣知縣

武攀龍之父善積於身祥開厥後教子著義方

之訓傳家裕堂構之遺茲以覃恩贈爾爲文林

郎河南河南府洛陽縣知縣錫之勅命於戲殊

榮必逮於所親寵命用光夫有子承茲優渥永



芑忠勤

勅贈孺人曹氏

制曰奉職在公嘉教勞之有自推恩將母宜錫典之  
攸隆爾河南河南府洛陽縣知縣武攀龍母曹  
氏壺範宜家夙協承筐之媿母儀貽穀載昭晝  
荻之芳茲以覃恩贈爾爲孺人於戲彰淑德於  
不瑕式榮象服膺寵命之有赫永賁泉壚

勅文林郎河南河南府洛陽縣知縣武攀龍

制曰錫類推恩朝廷之大典分猷亮采臣子之常經

爾河南河南府洛陽縣知縣武攀龍職任花封  
才堪良吏清廉克彰乎庶事慈惠允著於當官  
慶典欣逢新綸用賁茲以覃恩授爾爲文林郎  
錫之勅命於戲弘敷章服之榮用勵靖共之誼  
欽茲寵命懋乃嘉猷

勅贈孺人蘇氏

制曰恪共奉職良臣旣殫厥心貞順宜家淑女爰從  
其貴爾河南河南府洛陽縣知縣武攀龍妻蘇  
氏含章協德令儀夙著於閨闈黽勉同心內治



相成於夙夜茲以覃恩贈爾爲孺人於戲龍章  
載渙用褒敬戒之勤翟弗欽承永作泉原之賁

誥贈中大夫江寧兵備道布政使司叅政武承甫

制曰恩彰下逮勉篤恭於群寮家有貽謀本息勤於  
大父用溯源流之自爰推綸綍之榮爾武承甫  
乃江南分守江寧兵備道布政使司叅政武攀  
龍之祖父植德不替佑啓後人綿及乃孫丕彰  
鴻緒休貽大父聿觀世澤茲以覃恩贈爾爲中  
大夫江南分守江寧兵備道布政使司叅政錫  
恩誥命於戲垂裕孫謀已沐優渥之典崇褒祖  
德用邀錫類之仁貽厥奕祚佩此新綸

誥贈淑人韓氏

制曰一代褒功勸酬示後再世承恩崇獎及先績旣  
懋於公家寵宜追於王母爾江南分守江寧兵  
備道布政使司叅政武攀龍祖母韓氏爾有慈  
謀裕及後昆念茲稱職端由壺教爰錫褒儀之  
貴用昭種德之勤茲以覃恩贈爾爲淑人於戲  
邇其家法愛勞旣殫先圖賁乃國章昌融益開



來緒永期丕贊用席隆庥

誥贈中大夫江寧兵備道布政使司叅政武篆

制曰揚名顯親爲子者願以令德歸之父考績褒賢  
教孝者宜以高爵作之忠是用推恩特申休命  
爾贈文林郎河南維陽縣知縣武篆乃江南分  
守江寧兵備道布政使司叅政武攀龍之父義  
方有訓式穀無慚念爾嗣之勤勞旣克家而報  
國俾爾澤之昌大爰錫類以昭仁茲以覃恩贈  
爾爲中大夫江南分守江寧兵備道布政使司

叅政錫之誥命於戲教誨爾子永勿忝於家聲  
聿修厥德尙無負於國恩欽承寵命慰爾幽靈  
誥贈淑人曹氏

制曰國體勞臣必遡源而沛澤家崇詰胤爰歸善於  
厥生盛典維新壺儀愈著爾江南分守江寧兵  
備道布政使司叅政武攀龍母贈孺人曹氏幃  
範克端胎教居身教之先慈訓惟勤能愛在能  
勞之後宜沛馳封用昭母德茲以覃恩贈爾爲  
淑人於戲子情罔極感顧復而敦孝國綸普被



念劬勞以疏榮嘉乃思勤褒其遺範

誥江南省分守江寧兵備道布政使司右叅政武攀

龍

制曰褒忠表義昭代之良規崇德報功聖王之令典  
特頒恩命以獎勤勞爾江南分守江寧兵備道  
布政使司叅政武攀龍才識博通性資醇謹佐  
理藩司小心彌勵宣勞罔懈夙夜克矢乎恪共  
奉職無愆官守益彰夫清慎慶典欣逢新綸用  
賁茲以覃恩特授爾階中大夫錫之誥命於戲

思推自近乃弘獎夫崇階業廣惟勤尙克承夫  
寵錫欽予時命勵爾嘉猷

誥贈淑人蘇氏

制曰夙夜維勤人臣寧遑內顧伉儷無忝國常豈靳  
隆施錫章服以酌勲念壺儀之媲美爾江南分  
守江寧兵備道布政使司叅政武攀龍妻贈孺  
人蘇氏克勤內德宜爾室家眷良臣靖共之猷  
賴淑女匡襄之助爰褒令範式沛新綸茲以覃  
恩贈爾爲淑人於戲敬爾有官肅閨門而合好



職司其內尙黽勉以同心祇服殊恩用昭壺德  
誥封淑人田氏

制曰宜家無婦勞臣不免于內顧之憂繼室有人盛  
朝應恤其相夫之德何分先後並責思綸爾江  
南分守江寧兵備道布政使司叅政武攀龍繼  
妻田氏嗣操壺政克相夫綱幃有前徽旣見和  
柔合德廷申再命用彰黽勉同心茲以覃恩封  
爾爲淑人於戲內則是嫺允垂光於青史令儀  
不忒宜加誌於深閨尙克欽承以昭寵命

勅贈文林郎江南潛山縣知縣常貢

制曰資父事君臣子篤匪躬之誼作忠以孝國家弘  
錫顛之恩爾常貢乃江南安慶府潛山縣知縣  
常大忠之父善積於身祥開厥後教子著義方  
之訓傳家裕堂構之遺茲以覃恩贈爾爲文林  
郎江南安慶府潛山縣知縣錫之勅命於戲殊  
榮必逮於所親寵命用光夫有子承茲優渥永  
芘忠勤

勅贈孺人申氏



制曰奉職在公嘉教勞之有自推恩將母宜錫典之  
攸隆爾江南安慶府潛山縣知縣常大忠母申  
氏壺範宜家夙協承筐之媿母儀貽穀載昭晝  
菽之芳茲以覃恩贈爾爲孺人於戲彰淑德於  
不瑕式榮象服膺寵命之有赫益賁泉壚

勅江南潛山縣知縣常大忠

制曰錫顛推恩朝廷之大典分猷亮采臣子之常經  
爾江南安慶府潛山縣知縣常大忠職任花封  
才堪良吏清廉克彰乎庶事慈惠允著於當官

慶典欣逢新綸用賁茲以覃恩授爾爲文林郎  
錫之勅命於戲弘敷章服之榮用勵靖共之誼  
欽茲寵命懋乃嘉猷

勅贈孺人薛氏

制曰恪共奉職良臣旣殫厥心貞順宜家淑女爰從  
其貴爾江南安慶府潛山縣知縣常大忠妻薛  
氏含章協德令儀夙著於閨闈黽勉同心內治  
相成於夙夜茲以覃恩贈爾爲孺人於戲龍章  
載渙用褒敬戒之勤翟茀欽承永作泉原之賁



勅封孺人鄭氏

制曰臣子敦服勞之誼典既疏榮女士嗣淑慎之徽  
恩宜金茂爾江南安慶府潛山縣知縣常大忠  
繼妻鄭氏素嫻內則動協女箴相夫載著勤勞  
宜家克彰令譽茲以覃恩封爾爲孺人於戲蘋  
蘩繼媾式揚彤管之輝綸綍同褒勉贊素絲之  
德

序 石壁寺鐵彌勒像頌并序

唐 前濮州郵城尉林諤撰

石壁寺太原府參軍房璘妻渤海高氏書

維佛曰覺是法曰空鎔範所謂敬田薰崇可兼意  
境自西林宴城東夏聞教納羣動故廣闢度門詣  
真宰卽密傳智印功應沙劫花慈金界支提所以  
列衆宇建葺所以遍山林石壁寺者晉之西山舊  
號石壁谷隋諱西壽陽縣唐改壽陽爲文水先朝  
分置交城而立寺焉太宗昔幸北京文德皇后不



豫輦過蘭若禮謁禪師綽公便解衆寶名珍供養  
啓願玉衣旋復金榜遂開因詔天下名山形勝皆  
表剎焉所以報護力廣真諦也特起緝臺之制頗  
餘紫禁之恩禪師尋終官寺初創分身建塔遺跡  
巋然多寶不開吾徒安仰年蒿四紀紹復六僧修  
伽藍者壅潤脫造山閣者毅本立竟未雄成且爲  
能事粵邑宰燉煌張公令孫濟信香緣台鉉英胄  
隱若敵國知無不爲行春之餘瞻星開製琢拓巖  
峯所以面雙峯築基林間所以立前殿飛廊右轉  
高門南豁化檻粲爛於虹澗漱渠香藹於龍鱗附  
麗張皇公之教也復次寺大衆縣諸吏鄉三老等  
端念斷結廻向增修屬廊殿功闕請鼓鑄像設信  
施山積稽懇雲奔茲朔再移公難久抑爰咨上座  
普公曰和上萬億之中已經付囑一方之內僉謂  
導師此處山泉人間卓絕常歎庭宇淺狹形像卑  
古旣衆心同欲敢仰屈專知先捨俸錢次添淨觀  
想望耆闍之德思摹堯率之節寶臺繫念於儀形  
華林正觀於神衛俾開元二十六年十月十五日



鑄鐵彌勒像一座良冶攻索神物助銅迴祿藝雲而噴鍊飛廉噫風而沸液談漏鈞外迺徹金光非普公之摠衆罄心調御之慈悲冥應則何以髣髴相好成是福潤十二月八日設大齋而出之都人嚴護以禮供掌事蒸掀而改座錐制設色晬湛起容頃者都師思九先患兩足綿歷數年醫巫竭精蹇蹇生念忍苦強步有加無瘳當監理之夜忽覺輕舉及成像之日曳舄如初此則指麾易容如鳥出殼之攝也此寺幽深遠邃林壑猛獸不育濡草

羅生列郡早亢祈之則霖雨闔境歲儉念之則豐饒感觸加敬警俗整僧此則軒臺不敢西射廬山長存東首也然結構大廈兼寫聖容工不召而來役不言而應始謂陶唐之俗家盡歸依追悟巧妙之徒人皆筋力毀像云畢居處自空此則梵帝輸靈匠育王獻神兵也夫金者物之取剛像者代之崇奉見不壞想故因感以存質在有爲跡故憑應以住法是梵塲也其炳煥乎上座普敬寺主惠璣都師思九法師元琰大德茂忠守迪常念寶定洎



龍象法胤貞實真華戒珠圓明智劔猛利當對初  
地甃擇勝於閑安果證中天已授記於文佛鄉望  
王思貞縣吏郝仙壽等五色鸚鵡千里騏驎瓊樹  
塵映玉匣氣浮古署或列於桐鄉虔承遂陪於柰  
苑奉鍾離之舊政以喜得人心結曇彌之後緣仍  
為佛事於戲否往泰來聖作惠出微妙用之發揮  
匠意表刻紀靈則我皇之會昌景福天主之示現  
功利不其茂絕穹谷摩滅蒼岑者哉諤佗佗不偶  
誠敬與徒發於蔭栖白林為頌詞欲徵於靈  
運石壁言詩貝葉尙記買園線花亦題施樹佛則  
無愧謹偈銘云

世尊傳 兜率天 彌勒宴坐對諸仙 晉山  
記 石壁寺 佛影下來留此地 新殿開  
望昭廻 白毫放兮照雲隈 危樓傲 臨慈  
像 翠微濃兮洗烟上 張公作 神鬼諾  
五十六億龍華樂 靈匠罷 真僧指 八萬  
四千獅子駭 鎮帝鄉 歸梵場 法輪轉兮  
衆福證 鉢衣拂兮聖劫長 開元廿九年歲  
在辛巳六月庚辰朔廿四日癸卯建

明

交城縣誌序

邑令

張文璧 棲霞人

古昔帝王統一函夏必有內外史以籍名物而權



政教降至列國制亦不廢晉之乘楚之檣杞魯之春秋槩可見矣然古之列國卽今之郡縣也今郡縣之誌卽古之外史也可獨廢乎歲丙戌夏六月余承乏蒞交土思得素所稱民風土俗籍者閱之得縣綱冊甚略詢厥誌曰遺矣廼詢鄉縉紳士曰誌曷遺乎曰交嘗有誌昔韓諫議楊刺史所後先而纂次者緣未鏤梓日尋散遺至今曠典未舉或者將有待乎余曰吁誌之在邑如日月之在天燭之在幽室也可一日遺乎趨今弗舉竟將誰待我

儕寧無責耶卽欲共舉厥事值歲大饑昕夕營謀無暇刻越明年丁亥頗熟迨今戊子春少暇莫圖前舉遂禮延鄉之縉紳劉公孔泉康公萬峰士則王錦陽申羲山王舜立曹月溪諸君暨邑廣文先生原符樓霍南峰輩入館卽事仍分門析類詢訪編輯各盡所長而刪繁就簡執端取中裁而歸一余與有職焉綱領八曰地理曰建置曰食貨曰官政曰人物曰選舉曰雜紀曰藝文條目四十有八每綱有斷斷無諱詞每目有註註不膚釋皆以紀



載故實而華袞斧鉞勸善懲惡之義尤凜凜于言  
辭之表足與古良史同稱故無論春秋檮杌卽晉  
之乘庶幾再見于交哉民風土俗一覽無遺殆猶  
見日明晝見月明夜見燭明幽室則後之蒞交者  
又奚患其弗明于治哉朞月稿成持授邑庠田生  
需武生去橫常生福安生穩解生悔愆爲錄僉曰  
百年曠典一旦聿興因旬余言爲弁余惟茲誌之  
成爲不偶而尤恐其日久復遺也卽命工壽于梓  
爲序皆 萬曆十六載三月朔書于治東誌館

重修交城縣誌序

邑令 周 璧 歷城人

歲辛卯屬皇帝御寓之十有九年休烈液洽洋溢  
乎方外余不佞適從中州典試事歸主爵者以余  
宰交邑余奉命唯謹百舍重繭來視厥事甫下車  
召諸里老訊元元疾苦狀因曰交嘗有誌乎則對  
曰交故無誌交之有誌自張侯始採之輿論參以  
獨斷所紀載不啻詳矣將無當一目乎余亟命吏  
人進觀時寘座右蓋其綱凡有八焉乃爲之觀地  
里則曰美哉封疆左控恒霍右帶河汾其民織畝



習事猶有陶唐之遺風焉爲之觀建置曰代有作  
也不相沿已爲之觀食貨曰民惟邦本匪食疇依  
重乃民輕乃賦廢無負乃職余茲勗哉爲之觀官  
政曰欽哉美惡弗可掩也復爲觀選舉曰異哉途  
也所表見皆不虛然其効可睹矣爲觀人物曰美  
哉喆人其靈秀所鍾耶雖不能至然心嚮往之又  
爲之觀藝文曰言之無文行之不遠若之何廢詞  
也爲之觀雜紀則又曰仙釋災祥何國蔑有然非  
訓矣觀止則嘆張公成斯誌也與百年之曠典羅

一方之故實俾後之蒞茲土者得以按圖索駿功  
亦不細矣惜也文獻湮沕一時擗摭多所遺失其  
所爲取舍或未能適中而以淫蛙亂雅樂者逞逞  
有之余緣是有慨於中思一振刷之未遑也因屬  
彭景菴先生共成其事先生閔然謝不暇越三稔  
餘先生選入中秘余謂先生行矣如誌何適今不  
修其及修之乎修之此其時矣廼擇日開館延先  
生專綜厥務筆削唯厘而以達齋戴君文菴劉君  
佐之其叅校則鄉縉紳王公舜立也曹君養瑜也



田君栢坡也韓君養弘也武君栢谷也其諦閱則  
常生福也安生穩也韓生與立也胡生自新也陳  
生一選也閻生國本也至其斟酌損益集其大成  
余不佞何敢諉焉稿成披玩數四大率剪其蕪穢  
增其闕陋正其亥豕存者十五六易者十二三卽  
不敢謂信今傳後與古外史金垂不朽其跡前所  
編次不大有逕庭哉爰付殺青且就正于好古君  
子其首肯是編用以資攷究則唯命其以爲非是  
而弁髦之亦唯命余思余之涼德莫爲之記重有

媿於茲編也因序以自警云

萬曆二十三年乙未冬月書于治東誌館

磚包城工序

邑令 薛國柱 吳堡人

余以西鄙豎儒叨列簡選除牧茲土下車之日卽  
登陴閱視城垣薄而將圯低而可憑遂惴惴然有  
復隍憂矧其時武備衰弛於東北流氛橫肆於西  
南誰司專責何恃不恐於時卽有修築志然政無  
以及民信不足孚衆草率而舉之疑怨從此生焉  
其於久大之業仍弗濟也然而經營之念日夕在  
茲矣越期歲聖天子以四事課群吏遣分監覈余



儲備俱有成緒止以城垣遂致疏叅雖蒞任淺而  
有待賦才達而有爲仍以之鐫貳級而海內變態  
日甚蹂躪畿輔戮屠郡邑陸拾有奇省會告陷藩  
封震驚流寇因之播毒於秦蜀楚豫之間福襄諸  
藩相繼而淪州縣未易數數也余益滋懼曰天下  
爭壞於誘而成於任有如此城及今恃其不來固  
以徼倖爲長策萬一有不可測不可言之變將誘  
之難與慮始之凡民亦晚矣卽以經營之成筭密  
質之士大夫之有識者惟恐非常之原爲黎民惧  
也幸大行李公諱之奇號卦嵐者力爲主持始終  
贊勦而原任知縣田公諱斯茂號毓藩者孝廉武  
公諱攀龍號際雲相與輔而翼之富者輸財貧者  
輸力而民心之疑畏定矣余拘俸與設處約金五  
千而紳民之樂輸約金七千爲磚灰工匠之用其  
他力役之費大約不過萬金卽照都里之肥瘠爲  
丈尺之多寡從公分部百姓愈信財力所費無幾  
而歡欣子來之狀各爭先以告竣時直指大人僉  
各上臺親目之皆擊節嘆賞曰勞而不怨悅以忘



勞是何以得此于民哉于是賁成在貳年而報竣  
在數月其時窮民得以生活者當以萬計是興作  
中寓賑恤矣更可異者未加鞭扑而遂有成功且  
是役之後民和年豐城完麟產若不知爲大事旣  
舉大衆已動也其總理出入巨細精詳則生員解  
吾義覃敏郭秀也輸助多金則生員陳三才孫芳  
運等僉監生李敏識武接湯耆民徐騰龍孫紹運  
等也督理磚灰勤課工作則武槐薛登選楊漸通  
李花香闔竒振陳三縉闔得心牛藥康魯邦等也  
余嘉其義酬其勞與民同樂其成詢之以勞曰忘  
之詢之以怨曰忘之浸假而頌美於余余曰雨暘  
時若興作不驚天之賜也四事課成或以季報或  
以月稽聖明之功令上臺之指示也至其樂輸倡  
先子來恐後皆爾士民之忠義余鹿鹿魚魚何力  
之有焉但願我交人士世世子孫和衷以守德日  
以隆風日以淳則崗陵昌熾之福亦與此城共垂  
久大于無疆也



國朝

牧愛堂編序

禮部尚書

龔鼎孳

合肥人

憶去年春趙子天羽謁選得交城客有謂予者曰  
 以趙子之文學丰采蔭映海內慮無不為石渠金  
 馬重而乃為令又趙子試上等應受郡李李與令  
 級雖平體貌懸甚而趙子奉新令甲改授得無有  
 違情拂志遂生驂屑不平之感乎又曰趙子少年  
 豪俊交遊最廣所至車蓋候門如織今即為令亦  
 應得吳楚間通都大邑有文物聲名足以恣其鼓



舞餘摠之用而乃就大行山邑得無有傲情放志  
遂著夷然不屑之態乎又曰趙子才負四應天下  
何事足以當其意者蕞爾交城固枳棘之栖也得  
無逞其一往之氣擊斷剗割或涉于汎駕者乎予  
曰否也趙子量遠遠則不以目前所不足者自隘  
趙子學靜靜則不以一已所有餘者自恃趙子正  
未可測也後數月客從晉來謂予曰趙子固不以  
令也而輕易之也趙子固不以交城也而鄙夷之  
也予曰何以徵之客曰趙子至邑卽集其父老子

弟于庭殷勤懇惻求其疾苦而謀所興革次第舉  
民輸租至者雖窮鄉僻處之農從未見縣城官署  
皆得從容堵下自言其情以訟至者卽孩穉媼媪  
必解頰下氣不厭委曲察真僞民樂而親之以爲  
凡令茲者齷齪叢闖曷勿論已若英妙穎發率尊  
嚴如神伍伯震呼辟除小民先休惕喘汗莫能達  
胥吏反得借威福爲奸慝今似此是與民揭雲霧  
而睹青天也又蒞任有公費計里聽云例也徵租  
有羨餘以備耗亦云例也牙僧各分日應薪米塩



蔬以及布帛價十給五中又有分蝕之者亦無不云例也凡此舉民所甘心趣赴恬不驚怪安固然趙子一旦剗革若恐浼焉民以爲作吏者方將疆民所不願以困民也歌之曰趙公齒漱汾水又開濬渠利躬自相度形勢高下遠近利害爲民設千百年計以與雨暘平嗟夫吏之傳舍其官也久矣又至邑輒共城隍神誓毋以苞苴貽神羞及五月告旱甫禱神祠雨隨車下三日霑足歲用稔益趙子之與神相信也深矣以故流移盡復夜犬不吠

于是聚學校士子偕之講桃經義示之師承訓以作文勿爲俗囿月有課季有試士風丕振不矜文翁之治西蜀吳公之守河南也至于決獄通敏而莠民悉薙執法嚴一而蝨胥悉祛皆餘事耳蓋趙子之不輕易其令不鄙夷其民如此予聞之笑曰予向者固常言趙子之量遠而學靜也奚埃今日哉方今晉中大吏皆以豐沛勛臣用明無所不達廉無所不親爲令者易于見守易于見才趙子旦夕登薦牘循吏名徹



帝座矣客又曰人非始之之難也而終之之難趙子  
勤于始也得無怠厥終乎予曰向固謂趙子量遠  
而學靜也豈有遠與靜者而終始之慮哉行與院  
中同待漏矣客以爲然遂攬筆述之爲序以寄時  
康熙八年四月朔三日

建修縣署序

縣令 趙吉士 錢塘人

天子之下縣令之上自宰執部寺遊而至於郡守  
雖官之大小不同而其爲蚤作夜思出政令以治  
此百姓一也是以天子所居曰宮自宰執部寺以

至守令所居各有官廨雖居之大小不同而其爲  
安是居而蚤作夜思出政令以治此百姓一也吾  
嘗遍游江南薊北中州間其縉紳巨族往往翠簷  
朱甍連雲蔽日至官廨恒任其傾欹破壞而莫之  
顧何也自封建廢而郡縣立諸侯不以世相襲居  
官者視其居如傳舍近或數月遠不過數年輒去  
彼固以爲此非吾之所有也非吾之所有而吾爲  
之以利後人內有經營拮据之苦而外有傷財勞  
民之名不亦大愚乎克是心以往故有明知其利



之當興與害之當去而彼亦以爲及吾之身而止耳彼數十年數百年之利與害吾何爲焉嗚呼何其不思之甚也試思吾身以外何者是吾之所有如以官居爲傳舍豈爾室爾家能世傳而不爲人所舍乎如以暫處爲傳舍豈爾子爾孫能久傳而不爲人所舍乎念及此當亦無異視矣山右三代舊都茅茨土堵其民固習於嗇交城僻處萬山間荒陋尤甚縣署雖設僅名焉耳其大堂再建於明景泰其內署自萬曆二年以至於今無新之者每

官交代必以修整衙舍派累里民頻其患而吏役中飽官亦無從清釐遂成不破之陋弊予未任前此地已缺令五載其內東西十數間敗不能葺署篆者盡拆之以爲薪自三廳後僅五間再後三小間耳大都壘土爲牆架拱把以爲梁爲棟疾風則患廳搖大雨卽患滂沱予初至予無所容偃仰焉予卽其之如關防何蒞政五月庶績稍清乃捐資鳩材給餼興工廓其舊趾而創築之自二三堂至內皆廣三間爲五間別建耳房廚房共十六楹室



之東向有軒爲予退食讀書處顏曰臥琴案牘所  
不入者二堂之傍爲柱笏亭賓朋譚讌之地入冰  
壺右轉登遙集臺構陶縱齋于臺下以供公餘之  
嘯咏此外爲菜圃爲馬厰隔以重門司鑰者非白  
予不開四圍俱易以磚砌而內外始判然矣凡木  
以枚計者千數磚以塊計瓦以片計者共十二萬  
二千零民食於予而用于官者積三千六百餘工  
而人不以爲勞費出于予而捐于官者約金八百  
六十而予囊竭矣自戊申秋仲至己酉春季歷八

月而告竣竣之日置酒爲燕客舉卮以祝曰是役  
也唯予建之修之而成唯予居之而安予曰吁此  
天子之所置以居交之令治交之民者也交之署壞  
而交之令建之修之交之令居之今之令有時去  
則又後之令居之後之令建之修之也吾何爲也  
哉昔蔡凝爲中書侍郎遷晉陵太守將之郡更修  
中書解宇謂賓友曰庶來者不勞陸抗與諸葛恪  
換屯柴桑抗更繕葺其墻屋室廬雖果樹無恙恪  
入屯儼然若新而恪之故屯頗有毀壞深以爲慚



古今人不甚相遠安見蔡陸兩公行事不復再見  
此日耶客矍然起曰吾聞之天下事唯其當爲者  
卽爲之而吾若無與此古人之所行也公何多讓  
焉雖然莫爲之前無以創之莫爲之後無以繼之  
請以子之言勒之石以告後之繼子居此而蚤作  
夜思出政令以治此百姓者其無隙今日之功予  
媿其言而不能易其說也爲之序時己酉夏五

春夜踏雪却月湖堤序

趙吉士

三晉類多以水名其邑顧瞻左右文水清源是也  
而交邑亦以汾孔交流得名予初至見環邑皆山  
求一泓了不可得無復濠濮間想矣任三日闕城  
有水繞城隅心疑之吏人爲余言地本窳下積水  
以漚皮革人以其汙也不敢近心愈疑之暇往觀  
焉宛然小西湖風致惜不潔耳湖自東門曲折而  
南約二里許雉堞襟其前樓臺枕其北浮屠香刹  
烟樹林巒盈峙而照此水相傳下有泉穴雖寒暑  
不可得而涸予因作而歎曰是豈水之性哉物固  
有幸有不幸也爰命役夫廣植垂柳名以却月誠



居民毋汙我鑑湖一曲行將構紅橋牽畫舫與都  
人士游宴其間爲風塵俗吏解嘲又誰曰不可越  
一載柳浪方新水聲欲咽雖經品題而未工點綴  
甚哉簿書之誤人也改歲十二日予至汾陽寺勸  
農依夕還署酒闌月皎興復不淺同鄒子憲章蔣  
子荆名及予弟安侯緩步而至湖濱于時殘雪滿  
城堅冰澈底湖光月色逼人醉顏予與二三子盤  
桓離相之寺憑眺聖母之祠尋長堤轉曲渚歸漏  
三下樂而欲仙因念予生長東南澤國使通闡帶

闡之處得有此湖久成勝地豈必待今日趙子作  
令此間始爲之開生面也哉况此邦艱於得水水  
與境俱佳而人視爲畏途解有過而問者物固有  
幸有不幸也自今後吾願交之人士以及繼我而  
治交者勿棄此水復落賈豎手斯幸矣殘山剩水  
吾輩當共爲天地寶之其功莫大此三晉之邑類  
多以水名者良以其不易得欲人知所寶也夫時  
庚戌立春前二日

祝常二河公祖序

徵君

孫奇逢

保定人



子夏曰仕而優則學學而優則仕仕與學原非有二也強而二之遂若以經術爲一事經世又一事濂溪無欲故靜大儒之宗而理枉一節以去就爭則所設施於仕者無一不從無欲中出明道事事體貼天理令人不忍欺子靜荆門之政人皆以爲幾於三代王文成以武功廕封爵而世之談勲猷安社稷者咸推讓焉蓋儒之爲道小試則見治於小大試則見治於大以無爲爲本體以有爲爲應迹孔孟之學術孔孟之事功伊周之事功伊周之

學術原分之而無可分亦合之而不待合也常使君以山右名儒初宰江南繼丞吾郡下車未久卽過山居而論學焉予腐儒愧無所以仰佐使君者但見其簡率真至語移數刻而元氣噓動殆所稱仕優而學者耶繼而蓮陸謂予曰常使君實心任事間有以任事而竅竅或稍有不便於民者使君不難轉圜從之予曰此正學人之所難也顏克已舜舍己總見其無欲無欲故心虚心虛故事明卽此一段至誠心何不可見信於人荆門之政廕封



之功奚足以難使君哉予耄矣嘉平望前一日爲  
賤辰使君下鄙夷而贈之言前一日即使君嶽降  
之期喜真儒之再見幸斯文之將興爰爲之歌曰  
仕學兼優兮真儒載揚體用一源兮吾道斯昌實  
心以任兮剛毅發強虛心以承兮樂易和良中無  
欲兮民懷望大先立兮知益光經術經世兮內聖  
外王壽考作人兮山高水長

歲寒居答問序

同知 常大忠 邑人

天下名山大川多矣未至其地則固不知其美也

然而遊天下名山大川者亦多矣乃或有周覽數  
出詢以山之佳川之盛則又泮然與未至其中者  
無異則是遊天下名山大川者非其中有所甚好  
焉卽至其地猶然不知其美也未至其地而不知  
則無可責焉爾旣至其地而其心之所好不在焉  
其負此山川也實甚余生也晚而又居於晉之鄙  
自就外傳後先君子卽爲延師而教之然而所習  
者舉子業耳日揣摩時好以求一售其於聖賢之  
道理學之旨不啻與越人講秦事與燕人譚江漢



也暨壬辰釋褐筮仕於皖之潛陽因吏事而反求焉始悟前日伏首咄嗚父師之所以教我者皆爲今日寔用之事而非徒博一第爲也則又求所爲聖賢之道理學之旨於詩書文字中凡遇古人行一善事未嘗不感慨留連恨不遇古人之時居古人之位而惜吾有志而未逮也歲次癸卯來貳上谷守訪上谷之賢於潛之協鎮金君抱一因知有徵君先生至則造其廬而請益焉一飯之頃見其應門侍側如元方季方之在大丘前老老幼幼少

少長長雍然太和氣象則固在一室中矣先生言皆忠孝動卽楷模敝床疎席總成樂境非真有得於聖賢之道理學之旨者詎能如此乎及歸得歲寒居答問於蓮陸魏師之案頭再四翻閱然後知人苟有志於聖賢則無一人不可爲無一事不可盡無一時不可學反而求之於身心之間日用之際念之所啓意之所適去小人之中庸而存君子之戒懼無非聖賢立脚之所而凡古人之詩書文字則皆教我以從事之方而非謂汝但講求乎此



而口能爲言筆能爲書便謂聖賢在是也今者先生之書具在則天下之名山大川也余始頗知好之矣故梓以公同志凡有能至其地而心焉好之者其某山如何佳某水如何盛則固在其人自得之也余方由此而求進焉則固不能代爲之筌蹄矣

月夜讌遊却波湖序

王豸來

錢塘人

交之城東南隅有積水可三四頃下穴山泉水漲時足灌城外坡地歲庚戌天羽趙令君命挑濬之

其向之荒蕪而湮沒者則悠然其淵注也水之中有離相寺後峙石塔左右則真武聖母諸廟令君復修葺焉週城基之隙地咸植以柳中蓄澄流而塔廟參差相望造方舟泳遊其間綠陰濃處時眺城北羣山影入湖際固已身在三竺六橋間也余時客汾距交百二十里六月望後二日策轡過之遂與太原詔使徐子萬期及邑之燕子贊廷趙子相辰登舟燕集當是時月光如晝湖風吹衣鐘聲塔火隱隱波際相與溯流而飲扣舷而歌揚舲擊



汰之樂寔移我情矣夫晉人攄山而居無江湖河  
渚之勝故民有老死不識舟楫者求所爲畫船蘭  
漿張燈奏樂之事無有也今趙公創之余得偕趙  
公遊之交之民又皆沐趙公之政若教而共樂之  
闢糞穢以爲淳波穿闌闌而出佳致其可易得乎  
詩以咏之爰以誌茲遊于晉者不易得而嘆趙公  
爲不可及也已